

Protocol no. 111**Sezzüda da lündeschdi, als 17 da november 2014 09.00h - 12.00h**

Preschaints: Albert Mayer, Andri Poo, Men Caviezel, Dumeng Jann,
Marianne Werro-Lehmann e Marco Fallet (protocol)

Protocol

Il protocol no. 110 da la sezzüda da gövgia, als 23 d'october 2014 vain approvà.

998 021 FABRICA
Swissroof; lucarnas «Ochsenauge» vers süd e nord; stabilimaint
part veglia avant Baselgia

La dumonda es statta publichada ed i nu sun entradas ingünas protestas. Seguond cumischiun da fabrica es la fatschenda in uorden. Il cussagl conced' il permiss da fabrica cun vusch unanima.

999 021 FABRICA
Clot e Chasper Pult; müdamaints interns- fanestras fatschadas
vers nord, fanestra da tet e chamin a Sala

La dumonda es statta publichada ed i nu sun entradas ingünas protestas. Plünavant es avantman la posiziun da la chüra da monumaints, la quala fuorm'üna part integranta dal permiss da fabrica. Seguond cumischiun da fabrica es la fatschenda in uorden. Il cussagl conced' il permiss da fabrica cun vusch unanima.

1000 021 FABRICA
G. Lutz e C. Di Guimaraes de Aquino; renovaziun chasa no. 261
a Stron

Al patrun da fabrica d'eira gnü concess l'udida giuridica e quel ha inoltrà sia posiziun in fatschenda. Il cussagl decida da far amo ulteriurs sclerimaints culla chüra da monumaints. Davopro gnarà lura decis in fatschenda.

1001 83 TURISSEM
Pista dal Sömmi; masüras previssas da sgürezza a Vastur

A chaschun d'üna visita oculara cun ün rapreschantant da las PMNSFS as vaivan il vicecapo, il manader tecnic, il silvicultur ed il tangà in chosa cunvgnits d'effetuar las lavuors bsögnavlas per megliorar l'aspet da sgürezza pro la pista a Vastur in connex cul transit da jouslas a motor. Als 26 d'avuost vaiv' il cussagl decis d'effetuar quellas lavuors e concess il credit bsögnavel. Davo cha' l cumün vaiva effetuà quellas s'ha lura annunzchà il directer da da las pendicularas ed ha declerà, cha la separaziun previssa nu possa gnir fatta e ch'ün vial

separà per jouslas a motor nu vain da lur vart acceptà, quai our da motivs da sgürezza e da respunsabilità da las pendicularas. Il cussagl s'exprima zuond dischillus d'ün simil agir.

1002 300

PROMOZIUN DA CULTURA

Lavuors da pitur fatschada stabilimaint a Schigliana; dumonda da reponderaziun davart la soc. Sent Turissem

A chaschun da sia sezzüda dals 23 october 2014 vaiv'il cussagl decis da surtour il cuosts restants da fr. 3'150.00, però da tils squintar culla contribuziun annuala da fr. 5'000.00 cha la soc. da Sent Turissem survain, quai causa cha la società da Sent Turissem figüra sco possessura dal stabilimaint. La dumonda da sustegn d'eira però gnüda fatta davart la Grotta da cultura sco fittadina. Pro vain il fat, ch'in settember 2014 vaiv'il cumün fingià surtut da pajar cuosts da fr. 3'000.00 vi dal stabilimaint, quai però a charg da la promoziun da la cultura ed a favur da la Grotta, adonta cha'l stabilimaint appartegna a la soc. Sent Turissem. Sülla decisiun dal cussagl infuormesch'il president da la società da Sent Turissem da na ir d'accord culla decisiun da squintar l'import, causa cha l'investiziun tanghescha a la Grotta da cultura e na a la soc. da Sent Turissem. Il medem vala, seguond seis avis, pell'investiziun da la somma da fr. 3'000.00. Plünavant infuormesch'el cha la soc. da Sent Turissem s'ha partecipada vi dals cuosts cun üna somma da fr. 1'000.00 e na sco chi'd es manzunà illa decisiun dal cussagl cun fr. 450.00.

In basa da quai decid'il cussagl da na entrar sülla dumonda da reponderaziun. El va però d'accord da correger la somma dals cuosts restants in resguardond l'import prestà da la soc. da Sent Turissem da fr. 1'000.00.

1003 300

PROMOZIUN DA CULTURA

Società da musica Sent, aqüst da novas unifuormas, dumonda per ün sustegn finanziel

Il cussagl piglia cogniziun da la dumonda culla documainta chi demuossa cha la società es confruntada cun üna somma da cuosts da bundant fr. 50'000.00 per l'üna pel aqüst da novas unifuormas e per l'otra da duos paucas grondas.

La soc. da musica significha per ün cumün ün grond inrichamaint cultural. Il cussagl decida da contribuir la somma da fr. 15'000.00 pauschal pels aqüsts previs.

1004

DIVERSAS SCHEFS

Chapella da musica populara Tasna

Quella ais vi da l'ediziun d'ün disc cumpact e dumonda per ün sustegn finanziel. Il cussagl piglia cogniziun da la documainta e da la cumposiziun dals cuosts previs e decida da contribuir la somma da fr. 250.00.

1005

ORIENTAZIUNS

Zonas d'abitar per indigens / charta previssa als possessurs da parcelas

L'actuar infuormescha sur da la charta redigida previssa da protrametter als possessurs da parcelas, ils quals vaivan eir suottascritt üna decleranza d'aconsentimaint, la quala ais però scrodada. La charta cumpiglia eir la dumonda per üna prolungaziun da quella da 5 ons. Cun quai va il cussagl d'accord.

Molocs a Plazzetta

Il cussagl vaiva tut cogniziun da l'infuormaziun dal manader teocnic chi vaiva concepì ün congual dals cuosts per allontanar ils molocs a Plazzetta culla contribuziun previssa dals vaschins.

Ils cuosts per tuot l'acziun s'amuntan a bundant fr. 40'000.00, la contribuziun chi'd ais gnü miss in vista dals manzunats survart s'amunta a fr. 10'000.00.

Ultra da quai sto gnir manzunà, cha'l problem principal ais il fat, chi nun ais in vista ingüna soluziun per ün lö alternativ da ramassamaint central. In quist sen vain infuormà in scrit als duos vaschins.

Büro d'indschegners e geometers Kindschi SA

Quel infuormescha, d'as avair cunvgni cul indschegner da masüraziun e geometer patentà, Stefan Darnuzer, cha quel surpiglia l'incumbenza sco capoindschegner da la meglioraziun generala da Sent.

Cronica da Sent / Martin Pernet

Quel ingrazcha eir in scrit pel fich generus regal e pella bella charta davart dal cussagl cumünal.

1006

VARIA

Radunanza cumünala dals 5 november 2014 / rapport illa Posta Ladina

Quel d'eira croudà in möd ingüst, quai chi pertocca la tractanda «revisiun totala da la planisaziun cumünala». I segua uossa üna corrigenda lasupra.

Proget sauaziun Sent

Id es amo pendent la decleranza da garanzia davart la ditta EIG KRUSTAG pertoccant las lavuors sanitarias. Men Caviezel s'intermetta da la fatschenda.

Decess Lisbet Thew-Günzburger

La defunta vaiva regalà ün clavazin al cumün da Sent. Duonna Leta Mosca prevezza d'ir a funeral giô illa Bassa eir sco rapreschantanta dal cumün. Il cussagl va d'accord chi vain surtut las spaisas da viadi sco eir la dieta.

La societä d'util public Sent (SÜP) plazz'ün ingrazchamaint illa Posta Ladina, quai in nom dal cumün da Sent e da la SÜP. Il cussagl va d'accord cha'ls cuosts da l'inserat vegnan scumpartits pella mità tanter cumün e la SÜP.

L'actuar:
Marco Fallet

Il capo:
Albert Mayer